



MAJLIS PERBANDARAN SEBERANG PERAI

TEKS UCAPAN

YBHG. DATO' Sr HAJI ROZALI BIN HAJI MOHAMUD
YANG DIPERTUA
MAJLIS PERBANDARAN SEBERANG PERAI

SEMPENA

MAJLIS PERASMIAN PUSAT SUMBER ALAM
SEKITAR TAMAN TANGLING, SIMPANG AMPAT

TARIKH / MASA / TEMPAT

02 DISEMBER 2018 (AHAD)
2.30 PETANG

PUSAT SUMBER ALAM SEKITAR TAMAN TANGLING
LORONG BELIBIS 15
TAMAN TANGLING
SIMPANG AMPAT

Terima kasih Saudara/Saudari Pengacara Majlis

Yang Berhormat Tuan Goh Choon Aik

Ahli Dewan Undangan Negeri Kawasan Bukit Tambun

Yang Dihormati Ahli-Ahli Majlis

Majlis Perbandaran Seberang Perai

Yang Berusaha Puan Ir. Hjh Rosnani Binti Hj Mahmod

Setiausaha Perbandaran MPSP

Ketua-Ketua Jabatan dan Pegawai-Pegawai Kanan

Majlis Perbandaran Seberang Perai

Kakitangan-Kakitangan

Majlis Perbandaran Seberang Perai

Rakan-Rakan Media

Tuan-Tuan Dan Puan-Puan Yang Dihormati Sekalian

Assalamualaikum warahmatullahi wabarakatuh,
Selamat petang dan salam sejahtera,

Alhamdulillah, bersyukur kehadiran Allah S.W.T. kerana dengan izin dan limpah kurnianya dapat kita bersama-sama pada hari ini di dalam Majlis Perasmian Pusat Sumber Alam Sekitar Taman Tangling, Simpang Ampat.

Terlebih dahulu, saya ingin mengambil kesempatan ini mengucapkan ribuan terima kasih dan sekalung penghargaan kepada Yang Berhormat Tuan Goh Choon Aik, Ahli Dewan Undangan Negeri Kawasan Bukit Tambun dan penduduk Taman Tangling yang telah berjaya menubuhkan Pusat Sumber Alam Sekitar Taman Tangling ini. Tahniah dan syabas saya ucapkan. Saya amat memuji langkah yang diambil oleh kesemua penduduk Taman Tangling ini yang menjadikan kitar semula sebagai satu amalan.

Yang Berhormat, Tuan-Tuan Dan Puan-Puan Yang Dihormati Sekalian,

Saya pasti tuan-tuan dan puan-puan amat mengenali dan memahami peranan MPSP sebagai pihak berkuasa tempatan untuk kawasan Seberang

Perai. Berdasarkan perubahan expektasi rakyat yang mahukan perkhidmatan yang lebih cemerlang, MPSP telah merangka Pelan Strategi Seberang Perai 2018 – 2022 yang menetapkan sasaran untuk menjadikan Seberang Perai sebuah Bandaraya Rendah Karbon (*Low Carbon City*) dan Bandaraya Pintar (*Smart City*) menjelang tahun 2022.

MPSP adalah sebuah organisasi berorientasikan rakyat atau “*People Centric Organisation*” dan telah mengisytiharkan Bajet MPSP 2019 bertemakan *People Centric Budget*. MPSP memperkasakan rakyat dengan menggalakkan masyarakat untuk membuat keputusan dalam program-program pembangunan. MPSP mengukuhkan masyarakat sivil dengan mengadakan program yang menggalakkan perubahan tingkah laku, sikap dan gaya hidup dan seterusnya berusaha ke arah kehidupan yang mampan.

Hasrat MPSP adalah untuk menjadikan Seberang Perai sebagai kawasan yang bersih, mempunyai alam sekitar yang hijau dan mampan, selamat untuk didiami dan mempunyai masyarakat serta persekitaran yang sihat. Berteraskan kepada impian ini, pelbagai dasar telah dilaksanakan bagi memelihara, memulihara serta mempertahankan alam sekitar dan ekosistem di Seberang Perai, seperti:-

- I. Pada 6 Julai 2009, Kerajaan Negeri Pulau Pinang telah melancarkan kempen "*Hari Tanpa Beg Plastik*" pada setiap hari Isnin. Ini menjadikan Pulau Pinang sebagai negeri yang pertama dalam sejarah Malaysia untuk melancarkan satu kempen di seluruh negeri untuk mengurangkan penggunaan beg plastik. Setiap individu kini boleh menyumbang ke arah mengurangkan kesan tapak kaki karbon mereka supaya kita dapat memelihara alam sekitar kita untuk generasi yang akan datang. Dalam masa empat bulan sahaja, Pulau Pinang telah berjaya mengurangkan penggunaan lebih daripada 1 juta beg plastik. Susulan itu, inisiatif tersebut kemudian telah dilanjutkan ke tiga hari seminggu iaitu Isnin, Selasa dan Rabu mulai 1 Januari 2010. Manakala pada 1 Januari 2011, ia dilaksanakan pada setiap hari. Dalam usaha mempromosikan Sisa Sifar (*Zero Waste*), Pulau Pinang telah melarang penggunaan kotak dan pinggan mangkuk polistirena dalam semua majlis rasmi negeri pada tahun 2009. MPSP juga menyokong penuh saranan Kerajaan Negeri dan telah menetapkan tiada lagi penggunaan cawan atau bekas plastik pakai buang dalam semua mesyuarat dan program anjuran MPSP bermula pada bulan Julai 2018. Kakitangan adalah digalakkan membawa bekas minuman sendiri ke mesyuarat atau program-program anjuran MPSP.

II. Dasar Pengasingan Sisa di Punca adalah satu inisiatif positif yang diambil Kerajaan Negeri bagi mengurangkan sisa yang dilupuskan di Pulau Burung serta memanjangkan hayat tapak pelupusan. Pelaksanaan Dasar Pengasingan Sisa di Punca oleh Kerajaan Negeri telah berjaya mempertingkatkan sistem dan kaedah pengurusan sisa pepejal dan pembersihan awam negeri kepada satu sistem yang lebih teratur, mampan dan maju dan setanding dengan bandar-bandar antarabangsa maju lain.

Dasar Pengasingan Sisa di Punca berkuatkuasa pada 1 Jun 2016 tumpuan diberikan program-program pendidikan dan kesedaran kepada penduduk Seberang Perai. Pada 1 Jun 2017, Dasar Pengasingan Sisa Di Punca mula dikuatkuasakan dengan penguatkuasaan di kawasan harta bersama atau strata. Penguatkuasaan mula dikembangkan di kawasan komersial mulai 1 Januari 2018.

Melalui Dasar Pengasingan Sisa di Punca ini, semua penduduk di negeri Pulau Pinang dimestikan mengasingkan sampah mereka mengikut komposisi sisa pepejal iaitu sisa kitar semula (kertas, plastic,

kaca, tin aluminium / besi / logam) dan sisa baki (sampah kotor dan sisa makanan) sebelum dilupuskan. Keadah ini merupakan pengasingan sisa di punca yang paling mudah.

III. MPSP memperkenalkan *Smart Consumption Model 8R* pada 14 Januari 2018 iaitu *Rethink, Refuse, Reduce, Reuse, Repair, Re-Gift, Recover and Recycle*. Tujuannya adalah untuk mengurangkan beratan sampah ke tapak pelupusan sampah sehingga 50% dan meningkatkan kadar kitar semula kepada 70% menjelang tahun 2022. Kesan daripada pelbagai program pengasingan sisa makanan dan kitar semula, penajaan sampah berkurangan dari 1.6 kg/orang/hari pada tahun 2016, 1.09 kg/orang/hari pada tahun 2017 dan disasarkan berkurangan kepada 0.8 kg/orang/hari pada tahun 2022.

IV. Menjuarai Program *Upcycle* seperti kain rentang (*banners*) terpakai dikutip dan dijadikan beg membeli-belah. MPSP mempunyai *competitive advantage* dalam bidang pembikinan barangan *upcycle* sehingga berjaya mewujudkan *Upcycle Park* pertama di Malayisa yang dapat pengiktirafan dalam *The Malaysia Book of Records* pada 28 Julai 2018. MPSP sentiasa mengilap *competitive advantage* dalam produk *upcycle* dengan memberi penekanan kepada aspek

pengetahuan seni dan saintifik dalam penghasilan produk *upcycle*, iaitu penghasilan Mural 3D dengan kerjasama pihak Universiti Pendidikan Sultan Idris, Tanjong Malim, Perak. Program membuat Mural 3D di Menara MPSP menggunakan konsep “*Re-Imagining Waste as a Resources*” di mana mural yang dihasilkan menggunakan penutup botol minuman yang dibuang. Mural 3D ini adalah berdasarkan gambar-gambar pemandangan di Seberang Perai yang dipilih. Projek penyediaan mural-mural ini telah mula dilaksanakan pada 21 hingga 23 September 2018 dan untuk menjayakan program ini, sekurang-kurangnya 71,000 unit penutup botol telah dikumpulkan dan khidmat lebih 300 sukarelawan digunakan.

Program-program ini dianjurkan dan dilaksanakan untuk menyemai rasa tanggungjawab serta meningkatkan kesedaran di kalangan masyarakat untuk melindungi bumi dan alam sekitar. Ianya juga mengajak orang awam untuk bersama-sama memainkan peranan masing-masing dalam mengamalkan gaya hidup hijau sebagai usaha dan sumbangan kepada generasi akan datang.

Yang Berhormat, Tuan-Tuan Dan Puan-Puan Yang Dihormati Sekalian,

Warga Seberang Perai hendaklah menjadikan kitar semula sebagai tunjang utama dalam penjagaan alam sekitar yang lebih lestari dan hijau. Saya amat mengalu-alukan kerjasama daripada semua komuniti di SPU, SPT dan SPS untuk memaksimumkan kitar semula, meminimakan sisa berlebihan, mengurangkan penggunaan dan memastikan setiap barangan yang dihasilkan boleh diguna semula, dibaiki, dikitar dan dikomposkan sesuai dengan konsep 8R yang sentiasa saya war-warkan.

Seberang Perai telah berjaya dengan satu pencapaian yang hebat di mana kadar kitar semula bagi keseluruhan Seberang Perai telah meningkat daripada 22% pada tahun 2008 kepada 43.25% pada tahun 2017. Kadar kitar semula ini, adalah beratan kitar semula dari pelbagai agensi seperti pusat kitar semula di kawasan perkampungan dan taman perumahan, kilang, NGO dan juga sekolah-sekolah di seluruh Seberang Perai.

Sehingga kini terdapat 67 Pusat Kitar Semula di seluruh Seberang Perai (termasuk Pusat Sumber Alam Sekitar Taman Tangling):-

- a) Seberang Perai Utara – 20 Pusat Kitar Semula;
- b) Seberang Perai Tengah – 34 Pusat Kitar Semula; dan
- c) Seberang Perai Selatan – 13 Pusat Kitar Semula.

Bagi tahun 2018 sehingga Oktober 2018, sebanyak 174,383.554 tan barangan kitar semula telah dikutip dari seluruh kawasan Seberang Perai. Dan dari jumlah ini, 186.937 tan adalah daripada pusat-pusat kitar semula.

Saya mewakili MPSP amat berbesar hati sekiranya banyak lagi kawasan perkampungan mahupun taman-taman perumahan di Seberang Perai mengambil inisiatif mewujudkan pusat-pusat kitar semula atau pusat sumber alam sekitar. Pihak MPSP akan sentiasa bersama-sama tuan-tuan dan puan-puan dalam memberikan perkhidmatan yang sebaiknya. Kerjasama komuniti amat penting kerana ia dapat membantu MPSP dalam aspek menjaga kebersihan.

Yang Berhormat, Tuan-Tuan Dan Puan-Puan Yang Dihormati Sekalian,

Keterbukaan penduduk Taman Tangling dalam menyahut saranan MPSP untuk menubuhkan Pusat Sumber Alam Sekitar merupakan satu langkah permulaan yang baik untuk membentuk sebuah komuniti yang lestari sejajar dengan hasrat kita ke arah Bandaraya Rendah Karbon dan Bandaraya Pintar menjelang 2022.

Pusat Sumber Alam Sekitar Taman Tangling merupakan satu usahasama Yang Berhormat Goh Choon Aik, JKKK dan MPSP menggunakan pendekatan *smart partnership* melalui konsep 7Ps (*People, Public, Private, Philanthropy, Philosopher, Planet Partnership*), di mana melalui pendekatan ini, jalinan kerjasama pelbagai pihak secara tidak langsung memberi impak positif terhadap usaha-usaha pemeliharaan alam sekitar dan bumi kita.

Bagi memudahkan proses pemantauan, penilaian dan pelaporan, I-cycle memperkenalkan kaedah kod QR bagi penghuni taman ini untuk menghantar barang kitar semula ke Pusat Sumber Alam Sekitar Taman

Tangling. Sehingga ini, seramai 90 orang telah mendaftar sebagai peserta kitar semula taman ini. Kutipan barangan kitar semula dilakukan pada hari Ahad pertama tiap-tiap bulan dan pengumpulan pertama telah dijalankan pada 4 November 2018. Aktiviti tersebut telah berjaya mengumpul 187.5 kg barangan kitar semula yang mana 60% barangan kitar semula yang dikutip adalah hasil daripada penghantaran barangan tersebut ke pusat. Ini merupakan satu permulaan yang baik dan memperlihatkan komitmen para penghuni kawasan ini. Sebanyak 43% adalah terdiri dari kertas, 40% adalah plastic, 5% logam dan selebihnya adalah tin, aluminium dan botol kaca.

Yang Berhormat Tuan Goh Choon Aik juga telah berbesar hati untuk menghadiahkan Mesin *Economical Food Waste Composter* kepada Pusat Sumber Alam Sekitar Taman Tangling ini untuk membantu dalam proses penghasilan kompos daripada sisa-sisa buangan dapur. Baja kompos yang dihasilkan bolehlah digunakan untuk aktiviti bercucuk tanam oleh penduduk di sini.

Economical Food Waste Composter atau EFWC adalah merupakan inovasi MPSP dan UPSI untuk memproses sisa makanan. Ini membuktikan kerjasama strategik seperti yang saya umumkan sebelum ini melalui pendekatan 7Ps iaitu universiti sebagai gedung ilmu telah menunjukkan hasil yang boleh dimanfaatkan oleh rakyat.

Projek pengkomposan ini melibatkan pemprosesan sisa-sisa makanan menggunakan *Economical Food Waste Composter* atau EFWC iaitu menggunakan motor untuk pengudaraan dan mikroorganisma bagi mempercepatkan proses pengkomposan.

Yang Berhormat, Tuan-Tuan Dan Puan-Puan Yang Dihormati Sekalian,

Saya ingin merakamkan ucapan terima kasih kepada Yang Berhormat Tuan Goh Choon Aik dan penghuni Taman Tangling yang memberikan komitmen penuh dalam program kitar semula dalam usaha membantu MPSP untuk menjaga Seberang Perai supaya lebih bersih dan cantik serta mempunyai penduduk yang sihat sejajar dengan *tagline* MPSP iaitu **“Seberang Perai Aspirasi Bandar Masa Hadapan”** atau **“Seberang Perai Aspiring City of Tomorrow”**.

Saya seterusnya menyeru para hadirin sekalian untuk menjadikan kitar semula dan sisa sifar sebagai satu amalan dalam budaya hidup seharian, agar bumi yang kita pinjam dari generasi akan datang ini, dapat dikembalikan kepada mereka seindah dan se hijau mungkin.

Sebagai mengakhiri kata-kata dan dengan lafaz BISMILLAH saya dengan ini merasmikan **Pusat Sumber Alam Sekitar Taman Tangling, Simpang Ampat.**

Sekian,

Wabillahi Taufik Wal Hidayah, Wassalamualaikum Warahmatullahi

Wabarakatuh.

Terima kasih.